

豫

章

焚

書

第六冊

黑水考證

丁卯冬月
于幸昌禔廬

黑水考證卷一

萬載李榮陞

彌諾江

上

西次三經云崑崙之邱黑水出焉而西流于大杵
海內西經云崑崙之墟泮水黑水出西南隅以東東
行又東北南入海

大荒南經云大荒之中有不姜之山黑水窮焉 有
榮山榮水出焉黑水之南 有不庭之山榮水窮焉
有淵四方四隅皆達 言淵四角皆旁通也 北屬黑水

大荒北旁名曰少和之淵南旁名曰從淵舜之所浴

也

海內經云西南黑水之間有都廣之野后稷葬焉郭
注云其城方三百里蓋天下之中素女所出也

大荒西經云西海之南流沙之濱赤水之後黑水之
前有大山名曰崑崙之邱其下有弱水之淵環之
海內西經云流沙出鍾山西又南行崑崙之墟西南
入海黑水之山

按山海經所稱黑水南山經之水入東南海大荒
北經之水入東北海二條不合禹貢此外則皆言
崑崙西南之黑水也其所出所窮所入並旁近之

淵弱水流沙廣野皆不遺亦其源流深廣去中州
絕遠故著之比他水爲詳惟錯散諸經不相統故
人多畧之今彙爲一以便觀者山海周人所以寫
鼎非爲禹貢而作亦不知有禹貢然其流傳固出
於夏世黑水名跡幸相同於以證經宜莫之先然
知之者亦罕郭注流沙云今西海居延澤尙書所
謂流沙者形如月初生五日也按流沙弱水西方
連南北多有之此與上條之所稱旣在崑崙西南
與黑水附近則非雍州界之弱水流沙明矣各有
說繫於後覽者詳之

穆天子傳天子西征至於赤烏北征超行濟於泮水
北征東旋至於黑水封長肱於黑水之西河當作阿
曰留骨之邦乃循黑水至群玉之山先王之所謂策
府西征至於剗閭氏登于鐵山西征至于鷗韓氏大
朝于平衍之中西至於玄池奏廣樂樹之竹曰竹林
西征至於苦山西膜之所謂茂苑宿於黃鼠之山西
征至于西王母之邦賓于西王母觴于瑤池之上乃
紀丌跡于弇山之石飲于溫山飲于潯水之上舍于
曠原大饗正公諸侯勒七萃之士于羽陵之上乃奏
廣樂翔畋于曠原天子東歸又云南征東旋至于獻

水東南至于瓜纏之山絕沙衍水中有沙者至于積

山于滔水東征至于蘇谷至于長泱重鰓氏之西疆

東至于重鰓氏黑水之阿升采石之山采石焉鑄以

成器東至于長沙之山曰重鰓氏之先三苗氏脫字

東征南還至于文山取采石命駕八駿之乘東南翔

行馳驅千里至于巨蒐觴於焚留之山南征陽紆之

東尾河之水北阿又云自春山以西至于赤烏氏春

山三百里東北還至于群玉之山截春山以北自群

玉之山以西至于西王母之邦三千里自西王母之

邦北至于曠原之野千有九百里

計自黑水群玉山西行四千九百里而至大曠原
黑水源已過殆踰葱嶺近雷轟海傍千里平沙地
後世元太祖亦至焉特由古弱水境取道東北耳
後漢地理志云益州有比蘇縣故哀牢王國永平中
置

按漢武帝始開西南夷欲指通身毒爲嚮昆明所
阻故漢志及水經所稱皆西南隅小黑水至雍梁
界大黑水莫能明也明地理志云騰越州有大車
湖自徼外流入下游至比蘇蠻界注於金沙江比
蘇之名至明猶在蓋漢地已至大金沙江志家弗

知詳耳

晉人傳尙書孔傳云黑水自北而南經三危過梁州入南海正義云地理志益州郡計在蜀郡西南三千餘里故滇王國也武帝元封二年始開爲郡郡內有滇池縣縣有黑水祠止言其有祠不知水之所在鄭云今中國無也傳之此言順經文耳案酈元水經黑水出張掖雞山南流至燉煌過三危山南流入于南海然張掖燉煌並在河北所以黑水得越河入南海者河自積石以西皆多伏流故黑水得越而南也

按滇池黑水之祠至今猶存其水由西轉北入大

江雞山黑水列于南山經之末蓋在東南隅其水入東海酈氏引其文以名張掖之水則爲西北隅反於經其誤可知而張掖水亦北流入沙泊皆與入南海之黑水不相應孔氏謬云得越河而過後賢屢斥其非矣書經傳說亦云崑崙爲地軸其山根連延起頓包河南接秦隴直達長安爲南山黑水自燉煌而南縱可越大河之伏流其不能越河以南之南山也明矣餘不具錄

魏書西域傳阿鈎羗國在莎車西南去代一萬三千里國西有懸度山其間四百里往往有棧道下臨不

溯之淵人行以繩索相持而度

云云

波路國在阿鈎羗西北去代一萬三千九百里其地濕熱有蜀馬土平物產國俗與阿鈎羗同

小月氏國都富樓沙城其王本大月氏王寄多羅子也爲匈奴所逐西徙令其子弟守此城因號小月氏焉在波路西南去代一萬六千六百里其城東十里
有佛塔周三百五十步高八十丈自初建至武定八年八百四十二年所謂百丈佛圖也

魚豢魏畧西戎傳曰入西域前有二道今有三道從玉門關西出經婁婁轉西越慈嶺經懸度入大月氏

爲南道

云云

車離國一名禮惟特一名沛隸王在天竺東南三千餘里其地卑濕暑熱王治沙奇城有別城數十人民怯弱月氏天竺擊服之其地東西南北數千里人民男女皆長一丈脫一八尺乘象橐駝以戰今月氏役稅之

盤越國一名漢越正在天竺東南數千里與益部相近其人小與中國人等蜀人賈數至焉南道而西極轉東南盡矣

按曹氏西戎半爲蜀隔自安夷撫夷二護軍外不

通朝貢魚豢自記其所聞耳此兩國出入黑水故
云地近益部蜀賈得以時至也

樊綽蠻書山川篇云彌諾江在麗水西源出西北小
婆羅門國南流過泖叡苴川又東南至兜彌伽木柵
分流繞柵居沙灘南北一百里東西六十里合流正
東過彌臣國南入於海

又麗水一名祿禪江源自邏些城三危山下南流過
麗水城西又南至蒼望又東南過雙王道勿川西過
彌諾道立柵與彌諾江合流過驃國南入海水中有
獸似牛游泳則波濤湧禹貢道黑水至於三危蓋

此是也或云源當大月氏恐非也

小婆羅見下文涸敗苴字訛無考分流繞居見分
度圖邏些詳吐蕃傳祿禪江蠻書校本從永樂大
典作祿旱云旱字字書不載愚按宋程氏易氏引
蠻書並作祿禪今據以改之又考南詔德化碑刻
云今在大和城東十五里字半泐西開尋傳祿鄆
出麗水之金是字本作鄆祿鄆蓋尋傳之地麗水
逕其間因地而變名爾又云尋傳疇壤沃饒人物
殷湊南通渤海西近大秦開闢以來聲教不及贊
普鍾十一年刊木通道造舟爲梁耀以威武喻以

文辭擇勝置城裸形不討自來祁鮮望風而至按
尋傳漢比蘇縣一帶地蠻人不知而侈言之亦見
下文城鎮篇蒼望道勿彌諾彌臣驃國並見下二
水以彌諾江爲主故於彌諾江直言南入海於麗
水則言合彌諾江入海下文引禹貢黑水蓋總合
流言之傳寫家多訛錯今以源流爲次又按三危
山在崑崙山西見山海經其地去中國遠禹貢不
入導山唐肅宗以後屬吐蕃山名宜有存者此兩
江源流曲折綽時亦必有圖故得采而詳著之耳
番夷國名篇云小婆羅門與驃國及彌臣國接界在

永昌北二十四日程俗不食牛肉預知身後事

又大秦婆羅門國界永昌北與彌諾國江西正東安
西城接界東去陽苴畔城四十日程

按小婆羅門界據別條及唐書不得與彌臣及驃
國相接大秦婆羅秦字宜衍二婆羅俱在永昌西
北傳寫多訛唐地志云從安西城西渡彌諾江千
里至大秦婆羅門國此秦字又當爲小字之訛太
婆門東有彌臣吐蕃等國非直與安西城連界也
又云彌諾彌臣皆邊海國也在蠻永昌城西南六十
日程彌諾面白而長彌臣面黑而短性恭謹與人語